



*(Faint, illegible handwritten notes or bleed-through from the reverse side of the page.)*



**C**UM nuperrimè Liber (cui Titulus Dissertatio Lithologica) latine editus est ab erudito Viro Joanne Groenfeldio, M. D. Quem in Collegium nostrum admisimus; Nos etiam eundem Lithotomum plurimis Operationibus insignem approbamus, & Librum ejus Luce novâ dignum judicamus.

Tho. Witherley Præses  
Collegii Med. Lond.

Joannes Bett	}	Censores.
Edvardus Browne		
Gulielmus Dawkins		
Gulielmus Briggs		



# DISSERTATIO LITHOLOGICA

VARIIS

Observationibus & Figuris

ILLUSTRATA.

AUCTORE

JOANNE GROENEVELT,

Transisalano Daventriensi, M. D.

E Col. Med. Lond.

EDITIO SECUNDA.

LONDINI,

Typis *M. Flesher*, prostant venales apud  
*Abel Swalle* ad insigne Monocerotis  
in Cœmeterio Divi *Pauli*. 1686.

DISSERTATIO  
LITHOLOGICA

VARIIS  
Observationibus Figuris  
ILLUSTRATA

AUCTORE  
JOHANNES GROSSMANN  
Thomaeus Grossmann M.D.  
F. Col. Med. Lib.

EDITIO SECUNDA

LONDINI

Typis et Typographia Johannis Gessneri  
in Regia Societate Medica  
Invenit apud Davidum 1788.



---

Honoratissimo Domino,  
**D. GEORGIO,**  
COMITI FLINTENSI,  
Vice-Comiti de Weikham,  
BARONI de WEIM;

S U P R E M O

ANGLIÆ CANCELLARIO,  
Et Serenissimo

**JACOBO SECUNDO,**  
REGI ANGLIÆ,

A Secretioribus Consiliis,

Illustrissime Domine,

**Q**Uàm felix est bonæ Va-  
letudinis conditio, &  
quanta ejus beneficia sunt, ap-  
parere

## Dedicatio.

*parere possit, à miseriis afflictorum, quæ sæpius gravissimis Symptomatis conjunctæ sunt, & mortem frequenter comitantur infelicem.*

*Hæc omnia manifestum nobis reddunt, & honorem ejus artis docent, quæ Sanitatem vel conservare vel restituere solet. Ideoque inter omnes Artes summam sibi dignitatem vendicat, quippe quod scopus & finis ejus est Sanitas, quæ singulis & omnibus hujus seculi bonis longè præferenda*

## Dedicatio.

*renda, sine quâ bona alia quid  
sunt, nisi bonorum umbræ, imò  
nihil? Quis, illâ remotâ, nul-  
lus est bonorum usus, nulla in  
illis complacentia: adde quod  
in corporis humani benè esse,  
summa est delectatio, & ma-  
xima omnium hujus Mundi  
felicitas posita est, juxta illud  
Horatianum,*

*Si Vētri benè, si lateri est,  
pedibusq; tuis, nil*

*Divitiæ poterunt Regales ad-  
dere majus.*

B

*Quibus*

## Dedicatio.

*Quibus commoti rationibus  
Medicinam amplexi sumus,  
quæ per omnia secula in pre-  
tium fuit, & ejus professores,  
adeò ut in proverbium olim  
abiit,*

*Medicos esse honorandos.*

*Ad hæc usque tempora  
(illustissime Domine) gra-  
ti agnoscimus, quantum de-  
vincti sumus Nomini Vestro,  
Vobis cùm Collegii Regalis  
Londinensis Provincia deman-  
data*



## Dedicatio.

data fuit à serenissimo nostro  
Rege JACOBO, mibi,  
(alieno licèt origine) mibi in-  
quam, minimo licèt inter al-  
lios omnes radiis favoris Ve-  
stri & Benevolentiae Vestrae  
aspirâsti, & in Albo Medi-  
corum reliquisti, & (uti spe-  
ro) in salutem multorum, eo-  
rum imprimis, qui calculo af-  
flicti, ope nostrâ seu Oeip̃ opi-  
tulati fuerint, ut vitam in fu-  
turum degent doloribus & tor-  
mentis liberam: Sed ne ex-  
trâ cancellos vagari videor,

## Dedicatio.

*Hæc omnia cum bono Deo  
Vestris afflatus auspiciis cona-  
bitur ille, qui minimus licet  
inter clientes Vestros, maxi-  
mus tamen Nominis Vestri &  
summæ Vestræ Altitudinis*

Cultor humillimus,

J. G.

Clarissi-

---

Clarissimis Doctissimisque Viris  
D.D. PRÆSIDI & SOCIIS  
COLLEGII REGALIS  
Medicorum Londinensium  
TENUEM HANC OPELLAM  
In SUÆ OBSERVANTIÆ  
Perpetuum Testimonium

Humillimè simulac ex Animo

Dat, Dicat, Dedicâtque

J. G.

**L**ongâ rerum ferie & com-  
muni omnium experienciâ  
manifestum hoc habemus, & vel-  
le & posse civium Societati, &  
microcosmi quidem communitati  
prodesse magnorum & præstanti-

*Epistola Dedicatoria.*

orum virorum esse, quos in Politi-  
tia literaria invenimus.

Quod verò non minimum in-  
ter vestras laudes est, in summo  
positi estis prudentiorum consi-  
lio, & vobis commissa est cura,  
ne Medicaſtri licentiores quidem,  
ſed minimè Licenciati, Rempub-  
licam Medicinæ turbent & deho-  
neſtent in proprium emolument-  
tum, ſed in multorum ruinam;  
quinimò vobis demandata eſt  
provincia, ne minimi quidem er-  
rores in medicamentis ipsis com-  
ponendis aliorum inſcitia com-  
mittantur, ideoque veſtris ſub  
auſpiciis prodiit Pharmacopœa  
Londinenſis ſummo perfectâ ſtu-  
dio & diligentia. Hinc ſtudia ve-  
ſtra tam privata quàm publica  
orbi quoque univerſo tantum  
emolumentum afferunt. Adeò ut  
vos ſub DEO & Rege noſtro  
ſereniſſimo IACOBO, quaſi  
Deos



*Epistola Dedicatoria.*

Deos Tutelares & Æsculapios minimè erubescō, nec vereor appellare, adeò ut vos omnes magnifico illo *Homeri* elogio possim adornare,

Ἄντ' ἀεὶς Δεῖν ἐν ὑπείροχον ἔμμεναι ἄλλων.

Quibus de causis Vos hujus Diatribæ patronos advocavi, occurrebat enim mihi nullos magis mereri, nullis magis deberi, quàm vobis, qui honoratissimæ non modo Scientiæ, sed & practicæ Medicinæ dedistis operam, ideòque ut expertissimi estis Judices, ità candidissimi eritis hujus operis Patroni; scientiæ enim sive speculativæ sive practicæ sint, nullum habent inimicum præter ignorantem.

Sub vestris itaque auspiciis confidens procedo, nullus enim dubito, quin Collegium hoc vestrum, quod per multos retro

*Epistola Dedicatoria.*

abhinc annos non modò orbi Britannico, sed & Europæo plurimum profuit, & furculos etiam si extraneos recepit & inseruit (nullus inquam dubito) quin adeò fovebit, ut altius radices agere videantur.

Quorsum hæc omnia, nisi (ut non solùm nobis nati sumus) ut ità Vos huic Reipublicæ Anglicanæ inserviat, atq; etiam universi terrarum orbis commodo.

Et spes & ratio studiorum & cogitationum vestrarum in salute miserorum hominum sita est. Benè quippe nostis illud Poetæ esse verissimum,

*Non est vivere sed valere vita.*

Ad vos itaque, Viri magnifici, eâ spe contendo, ut meum hunc foetum, à peregrino prognatum, & coram vobis expositum, candido  
bene-

*Epistola Dedicatoria.*

benevolentiae Vestrae favore ita benignè accipiatis, ut prosperè succedat & Parenti & Foetui. Lithologicus est, observationibus quibusdam nostris interspersus.

Testes in vivis sunt, quos paucis jam elapsis annis, à crudeliori illo, de quo agit Tyranno, vesicae nempe calculo liberavi, quorum nominum Catalogum, ante annos aliquot, dedi Viro Ornatissimo Praesidi nostro nuperrimo, T. C. hunc à me requirenti.

Quod si praesenti Praesidi nostro ita visum fuerit, catalogum exhibere possum eorum qui à me arte Lithotomicâ exacti fuerunt, & opem οὐδὲ Θεῶν receperunt, qui Catalogus numerum excedit centenarium. Quod ad Virtutes vestras generosâsque animi dotes, beneficiaque imprimis in me collata attinet, ea omnia summâ reverentiâ ita amplexus sum, ut  
cum



*Epistola Dedicatoria.*

cum facultate nostrâ qualis est,  
impræsentiarum & in futurum  
Vobis me totum devoveo.

Vos interim animitus oratos  
velim, ut nostrum hoc Compen-  
dium vestro favore & patrocinio  
dignemini in observantiæ nostræ  
testimonium, simul & perpetuam  
Dignitatum vestrarum Memori-  
am.

Ità votis (quod aiunt)

multis precatur

Dominationibus vestris

Devotissimus

J. G.

A D



---

A D

# LECTORES.

**M**iramini fortasse, me Medicum, Lithotomiam exercere, cum videtur Hippocrates repugnare in juramento suo, & *ἰατρὸς ἐστὶν ἀνὸς καὶ ἀδωρτὸς*, nec calculo laborantes secabo.

Anno 1670. antequam Senatus Academicus Ultra-jectensis Doctorali gradu me adornaret, publicam, uti mos est in Academiis, de calculo vesicæ disputationem habui, quæ fortuito incidebat in manus Chirurghi cujusdam, nomine Henrici Velthusii, (tunc temporis) Lithotomi Amstelodamensis, ubi tunc praxin Medicam exercebam, qui postquam mecum familiaritatem contraxisset, frequen-  
tem

## Ad Lectores.

tem me accersivit testem, cum ægrotos à calculo exploraret; ad Empiricorum enim audaciam prævenientiam, statutum est in Hollandia, ne quis calculum secet, antequam Lithotomus in unius vel plurium medicorum præsentia ægrotum à calculo exploraverit, & post datum Magistratui testimonium conceditur Lithotomo libertas calculum execandi.

Quid si idem mos in Angliâ prævaleret, supprimerentur nimis audaces illi Empirici, qui Lithotomiâ abutuntur. Quid dicam? Annon habemus inter nos Scotum quendam, qui, ut auditione accepimus, arator fuit non ità pridem dum apud Anglos versatus fui, qui adeò audax fuit, atque etiamnum manet, ut in patientes ex omni genere & conditione cujuscunque Lithotomiam exerceat; quod adpueros & minores attinet, forte fortuito, & ex accidente, aliquo successu gaudeat, at illi

## Ad Lectores.

*illi qui cacochymiâ laborant vel plethorici sunt ob defectum artis medicæ in præscribendis medicamentis & corporibus præparandis, sæpius moriuntur, unde est quod tumores consequuntur, inflammationes & spasmi, atque ipsam aliquando mortem videmus. Indignatio cogit me loqui ulterius de homuncione hoc Empirico, qui adeò intolerabiles errores commisit, ut vix fide dignum pronunciare videar; sat scio humanum esse errare, nec omninò liberi nos ipsi sumus, at cùm apprehendimus in nobis errorem aliquem, omni curâ & diligentia, ut eundem excutiamus, studemus: ideoque in casu difficili communitur cum illis qui subactiori sunt iudicio in arte medica, ut possimus nosmetipsos invicem consultando informare. At Empiricus hic homuncio talis est, qui sæpius ausus est secare homines adultos minori apparatu, mittendo digitum in*  
*anum,*



## Ad Lectores.

anum, qui operationis modus talis est, ut in pueris secandis majori facilitate & successu observetur, præmissis præmittendis, at in aliis diversis audacior & minùs aptus est secandi modus, (scientes loquimur) mortem intulit immaturam, ut ille infelicitè nimis expertus fuit, qui habitavit in oppido vulgò dicto Limehouse, alter etiam miserè interiit, in platea dicta Oldstreet ubi audaciter nimis conatus est genubus supprimendo affectorum ventrem inferiorem, ut subinde calculus premeretur ad intestinum rectum, at, proh dolor! ægroti re infectâ derelicti sunt & incapaces redditi futuri beneficii & auxilii ab aliis qui Lithotomiam exercent, adeoque miseri è vita migrarunt.

Alius in loco (vulgò dicto Old Bethlem) qui cùm sectus esset in hunc morem barbarum, instanter mortem obiit subitaneum.

Quod



## Ad Lectores.

*Quod ad sexum fœmineum attinet, illas tractat modo admodum inhumano & indecoro, qui cum adeò literarum ignarus est, ut neque legere nec scribere possit, nec aliquam callet Anatomiam, nescit omninò vel situm vesicæ vel uteri, audax tamen fuit secare, ubi calculum tactu invenerit, atque ità acie cultelli partem vesicæ membraneam, uteri substantiam & intestinum rectum simul atque semel penetravit, & Virginem in tam miseram & desperatam perduxit conditionem, ut vix sine lachrymis exprimere possim, quam anonymam impresentiarum modestiæ gratiâ prætereò; hæc misera puella filia est suoræ calcarii in platea (vulgo dicta Silverstreet) cujus calculus ab ipso extractus penes me est, eumque in indignationem facti semper apud nos retinebimus.*

*Puellæ hujus adeò misera est conditio ut menstrua ejus, urina atque excre-*

excrementa effluunt per incurabilem fistulam, imperitâ ejus sectione causatam, adeò ut audacter satis nec minus verè pronunciare ausus sum quòd laniator ordinarius vel minimâ instructione præparatus operationem produceret longè meliorem, quàm Empiricus hic atque imperitus operator efficere possit. Si impensè aliquis desideraverit veritatem hujus historiæ cognoscere, me compellat, & libenter ei quocunque modo satisfaciam.

Phædrus notissimus ille Augusti Cæsaris libertus fabulam habet senariis versibus elegantissimis descriptam, de Sutore quodam, non ut Medicaſter noster (cui nomen solum est Sutor) sed reipsâ, qui medicinam nimis audax exercuit, & quia in Medicastrum nostrum optime quadrat, non pigèbit risus gratiâ verbatim describere:

Malus

Malus cùm Sutor, inopiâ deperditus,  
 Medicinam ignoto facere cœpisset loco,  
 Et vendicaret falso antidotum nomine,  
 Verboſis acquiſivit ſibi famam ſtrophis.  
 Hic, cùm jaceret morbo confectus gravi,  
 Rex urbis, ejus experiundi gratiâ,  
 Scyphum popoſcit : fuſâ dein ſimulans aquâ,  
 Antidoto miſcere illius ſe toxicum,  
 Hoc bibere juſſit ipſum, poſito præmio.  
 Timore mortis, ille tunc confeſſus eſt,  
 Non artis ullâ medicum ſe prudentiâ,  
 Verùm ſtupore vulgi factum nobilem.  
 Rex advocatâ concione, hæc addidit :  
 Quantæ putatis eſſe vos dementiæ,  
 Qui capita veſtra non dubitatis credere,  
 Cui calceandos nemo commiſit pedes ?

*Sed ad Velthuſium noſtrum reverto, cum quo quippe per annos aliquot communicaveram & plurimas operationes ab eo perfectas videram, ille tandem, ſupremâ Dei voluntate, hecticâ febre oppreſſus (quâ etiam fuit extinctus) me advocari curavit, ſuâque mihi dono dedit instrumenta Lithotomica, enixe rogans, ut illa in illius memoriam & miſerorum commodum ſuſciperem.*



*Videram plurimos & à defuncto  
 & ab aliis felicissime liberatos, hinc  
 & ipse, non solum inclinante, sed  
 & urgente naturâ, hanc operationem  
 aggressus fui, quam per annos  
 aliquot, (Deo adjuvante) felici ex  
 nostra parte successu, exercui, Me-  
 dicorum quorundam non infimæ no-  
 tæ, hanc artem exercentium exem-  
 pla imitando, Magnetis scilicet &  
 Ammonii, duorum præstantium Me-  
 dicorum, Johannis Anthracini, &  
 Mariani Barolitani, Guilielmi Fa-  
 britii Hildani, nec non Cornelii  
 Celsi, expertissimi illius Medici Ro-  
 mani (cui in perscienda hac arte  
 plurimum debeo) qui ipse nunquam  
 tam accuratè de Lithotomia scripsis-  
 set, nisi eidem propriam manum adhi-  
 buisset, unde & forsan Lithotomium  
 Medicum appellavit.*

*Et quis quæso mortalium nobilissi-  
 mam hanc operationem è manu Me-  
 dici eriperet?*

*Ipsi*



## Ad Lectores.

*Ipsi Hippocrati neutiquam hoc in mente veniebat, vulgares solummodo excludebat Chirurgos, inscios tunc temporis & temerarios homines, quibus ægrorum salus parum Curæ erat, Viros sagaciores simul & cautiores, secundum artem praxin dirigentes Lithotomiæ præponebat.*

*Sed quorsum hæc omnia? Quinimo leges Anglicanæ pro nobis pugnant. Statutum enim est Henrici Octavi anno regni trigesimo secundo, capite XL. paragraph. XI. αὐτολεξεί his ipsis verbis.*

*In quantum Medicinæ scientia comprehensivè includit & continet notitiam Chirurgiæ, ut speciem quandam Medicinæ particularem; Ideo cautum & statutum est, ut quilibet è Corporatione seu Societate Medicorum prædictâ, legitimè electus & admissus per prædictum Præsidentem, Censores, & socios Medicorum de die in diem, tam intra Civitatem*

## Ad Lectores.

*Londinensem, quàm per totum regnum Angliæ profiteri, prædicare, & exercere possit Medicinæ artem & scientiam, in omnibus & individuïs membris & partibus suis, &c.*

*Cùm verò, ut cuilibet notum est, operatio hæc difficilis & periculo plena est, & proinde ut Medicus peritiâ simul & cautione summiâ opus habeat, necesse est, amore Christiano & languentium ægrotorum misericordia commotus, ea inter cætera quæ ipsemet circa ægros sæpius observavi, typis bono publico mandavi.*

*Interim Benevolus Lector omnia & singula exploret, & judicium suspendat, & ita non dubitabimus, quin apud omnes peritiores arbitros gratiam aliquam merebimur, quo voto, candidissime Lector, desino, & te longum vivere & valere opto.*

*Dabam è Musæo (in platea dicta Throgmorton-street) Londini  
22 Feb. Anno 1684.*

---

I N  
L I T H O T O M I A M  
J O A N . G R O E N E V E L D I I , M . D .  
E T

Lithotomi Felicissimi.

**D**Eucalionæos Lapides, nec secula Pyrrhæ,  
Nec Niobes saxum, Musa referre *velit*.  
Sed miseros hominum Cruciatu, atq; dolores,  
Quas pœnas nunquam Sisyphus ipse tulit.

*Ut corpus redimas ferrum patieris & ignes,*  
Quo sine nulla quies, queis sine nulla salus :  
Hos secat, ut sanet Gronfeldius, arte peritus,

Intus qui tangens, in cute novit idem ;  
Cum scis ambabus manibus feliciter uti,

Dextera jam læva est, lævaque dextra Tibi :  
Ambodexter eris, ne sit fortuna sinistra ;

Sic Medicus fias, Lithotomusq; simul. (addi ;  
Eja age, jam possit meus hinc Tibi calculus

*Zoilus* ut nequeat rodere dente suo,  
Vive diu felix ! tumulus Tua cum tegat ossa

Talis erit, qualem non Ptolemæus habet :  
Cum fato cedas, humano corpore famæ

Extracti Lapides sint monumenta tuæ.

*Successus & Artis Tuæ Admirator  
& oculus testis cecinit*

J. B.

Peritissimo & Amicissimo

V I R O

D. JOANNI GROENFEILD,

E Collegio Med. Lond. M. D.

De Lithologia sua

AMICA GRATULATIO.

**L** Audarem, Groenfelde, nisi inviderem,  
Sed quidni *invideam* atq; *laudem* simul?  
Nam *laus* invidiæ comes est, *invidia* laudis,  
Ut nos alterutri *comites* & *testes* sumus;  
Vesicæ & Renibus obstetricamur uterque,  
Et rei sæliciter utrinque peragendæ  
Omen faustum addimus uterque,  
Utrinque, *quasi ex condicito*, feliciter peractæ  
Rem cecidisse ex Voto gratulamur.

*Amicitiam colimus, & tamen invidemus:*

*Felix invidia!* quæ æmulari tantum  
Didicit, & summas, sine noxâ, laudes,  
Sine metu aut odio *invidendas* dotes  
Proponit sibi gloriôsè imitandas.

*Scotus* ille, qui Calculum in *tenebris* explorans,  
Promit etiam *ilia* in mortiferam lucem,

\* Scotia à Abeat in suam \* Scotiam; in tenebras suas,

Συβρις Tenebrio indignus radio salutari,

Tenebræ. Dum tu *Belga* Artifex, & ego *Anglus*

De Calculo deq; morte *interdiu* triumphamus  
Io Triumphe! actum est de Calculo & morte.

Joannes Browne Lithotomus & No-  
socomii Regalis Sancti Thomæ  
Chirurgus Ordinarius.

Viro



I N C T A

# Telineatio.

teriam gene- { Cibus Crassus.  
Potus malus.  
Nausea.  
Voracitas.

meatus quàm decet.

ptum.

cipio mensz, intempestivum exercitium à cibo

PLANT  
OF

1. *...*  
2. *...*  
3. *...*  
4. *...*  
5. *...*  
6. *...*  
7. *...*  
8. *...*  
9. *...*  
10. *...*

PLANT  
OF

1794

Delivered

1794

BREVI

# Totius Co.

s naturâ cr  
nes debilita

Calo  
exce  
qui

ultas exequi

Natu  
visco

Retinetur in re-  
nibus ultra debi-  
tum, vel pro-  
pter

Quaz cum eori

Stris  
claus  
tuum  
renu  
um s  
um,  
aut

ernum aliqu



## ARTIC. I.

**Q**UOD ad Etymon attinet, ut Philosophus ait, Δεῖ πρῶτον ἐξετάζειν τὰ ὀνόματα, calculus itaque à calce nomen ducit, est enim corpus quoddam concretum, quod cum calcis instar sit in lapidem induratur, & apud Græcos λίθου, & affectus inde ortus λιθίασις dicitur, calculúsque renum proprio vocabulo νεφελίτις vocatur, mutuata scilicet ab ipsis renibus appellatione, quos Græci proprio idiomate νεφρὲς vocant, & quamvis nephritidis nomine quilibet renum affectus intelligi potest, cum tamen magnitudine doloris cruciatúsque vehementia cæteros facilè excedat, non immeritò (κατ' ἐξοχὴν) id sibi suum ac proprium fecit.

## ARTIC. II.

**E**X præmissis itaque patet, sub calculi nomine nos intelligere corpus durum in renibus potissimum ac vesicâ in lapidis formam concretum.

## ARTIC. III.

**A**Nxie hic velle inquirere, an calculus sit Morbus, an causa morbi, an vero symptoma, incassum foret: Quæstiones enim meræ de nomine sunt, & pro diverso respectu, diversimodè responderi posset.

Morbum tamen dici vix posse putamus (reclamante licet Galeno) cum nulla sit prava partium dispositio, Sed partis dispositionem vel sequatur vel immutet.

Dicetur vero causa, cum obstructionem, vel exulcerationem, dolores immenses, similiæque Causare aptus natus sit, qui etiani, quoties excernitur, in symptomatum classem venire solet.

## ARTIC. IV.

**S**ubjectum calculi quodnam sit, omnibus in propatulo esse arbitramur, vesica scilicet & renes, nisi cum natura deficit, & ut cum Philosopho loquamur, ἀμαρτυρα ἢ πύονος sit, quale ut oculis quondam nostris *Amstelodami*, anno 1671. exhibitum fuit, ita auribus vestris hic referre non dedignamur.

In Anatomia quadam corpus offendimus, quod vesicâ urinariâ omninò carebat,

bat, nec Vir erat, nec fœmina (virili dum viveret vestitu semper incedebat, uti tabulâ aversâ demonstratur, annos antequam moreretur, triginta sex agebat) in loco ubi pudendum debuit apparere, nihil habebat pudendi, ureteres erant illi solito multo latiores, qui à renibus ad umbilicum vergebant, ubi erat quædam protuberantia (epidermide privata) penis vulvæ officium supplens, paulo inferior, extuberantiam habebat in formam dactyli, non tamen perforatam, globulûmque ab utraque parte testicularem, viriles ei testes inguinibus abscondebantur, sed hæc ἀπεροσδίνυστα.

Subjectum itaque calculi sunt vesica & renes, qui non secus ac ad id destinati uteri, lapillis imprægnati conspiciuntur, quas demum gravissimis sæpe nixibus excludunt.

Sed hic quæstio incidit an calculus duntaxat in sinu qui ab ureteribus expanditur ejûsque tubulis generetur, an vero in ipso renum parenchymate?

Alterutrum negare vix possumus, quoniam, præter nostram experientiam, non pauci magni nominis Viri, Eustachius, Forestus, cæterique propriis id experimentis comprobârint; quorum loca, ne actum agere videamur, hic asserre super sedemus.

Notan-



Notandum tamen, calculum qui in propria renum substantia gignitur, si paulo grandior fuerit, absque dilaceratione in pelvim delabi non posse, cum carunculæ, quas processuum mammillarium nomine Anatomici indigitarunt, & per quas unus ipsis exitus patet, perforationes suas habeant tam minutas, ut vix capitis pilum admittant.

Quodque de calculo renum diximus, idem fere considerandum venit circa eum, qui in vesica fit, duplicem nempe ei concedi locum, tum, ubi in mediis urinæ undis nascitur, in ipsa scilicet vesicæ cavitate, tum etiam in extremis ureterum finibus, intra duplicem vesicæ tunicam, ubi è renibus minutulus delapsus & hærens quandoque accrescit, ureteres quippe dum non longè ab ejus collo vesicæ implantantur, priusquam in amplum abeant ad integri digiti latitudinem, duplicem vesicæ membranam perreptant, in quorum limitibus intra ipsam membranæ duplicaturam, calculus quandoque perficitur; non fluitans ut in cavo, sed vesicæ tunicis, quam firmissimè sæpe annectitur.



## ARTIC. V.

**I**Nficiari tamen hic nolumus in aliis quoque corporum partibus calculorum foetus nasci, cum & ipsius Hippocratis Auctoritas pro eo pugnet, 5. Epidem. Histor. 25. & tot Clarissimorum Virorum experimenta & nostrae observationes idem evincant.

*Job. van. Horne*, piæ memoriæ, Anatomix & Chirurgiæ, Lugd. Batav. quondam Professor, nostrâ memoriâ atque etiam præsentia, è cerebro *Adami Stuartii* (qui cum in vivis esset, Professor erat Philosophiæ) varios extraxit calculos \*.

Clarissimus *Fernelius* in pulmonibus diversæ duritiei calculos observavit.

In fellis vesicula hic *Londini* jam bis in Anatomica dissectione varios inveni calculos.

Nucis juglandis magnitudine calculum vidi mulierem per sedes ejecisse; quæ antea continuâ cardialgiâ oppressa fuerat.

*D. Tolet*, Chirurgus Parisiensis, refert se vidisse virum qui ante viginti annos calculum per umbilicum excreverat.

---

\* *Rich. Wiseman, lib. 4. cap. 8. de Ranula, observ. 3. refert se per incisionem sub linguâ lapidem extraxisse olivæ nucleo similem.*

Capavaccius, Paræus, Sennertus, Scalliger, Cæterique Viri celeberrimi tales plurimas Curiosis Lectoribus ostendunt observationes.

## ARTIC. VI.

**I**N assignanda calculi causa dissidentes admodum & contrariæ Medicorum reperiuntur sententiæ, sunt enim qui ad divina contemplationes suas erexerunt, & à primordiis creationis nostræ pœnâque apostasiæ humano generi Superiorum numine impressâ lithiasis causam petere conati sunt. Statuentes non mirum esse in terram reverti id quod ex terra ortum traxit :

*Unde genus durum sumus —*

Ut cecinit Poeta metamorph. i. *Fab. VII.*

Unde terrenæ constitutionis esse dicimur, & ossa gerimus lapidibus conferenda duritie & soliditate, quale est os petrosum in organo auditus, item dentes quibus mediam inter saxa & ossa naturam assignavit Creator sapientissimus.

Communissima tamen & maximè recepta cùm veterum, tum recentiorum sententia est : calculi, qui nempe in renibus fit, causam soli atque unico renum immo-

immoderato, ac quasi adurenti calori esse adscribendam.

Volunt quippe, crassa illa, viscosa, pituitosa atque tartarea, ut vocitant, excrementa, quæ materialem, (duplicem enim statuunt, materialem & efficientem) ejus generationi causam præbere afferunt, paulatim exiccari, & tenuioribus ac humidioribus partibus absumptis in speciem lapidis converti, non aliter ac videmus ex multis herbarum succis & mineralibus lapides medicamentosos & corrosivos à chymicis & Chirurgis lento quodam calore & exhalatione excoqui.

Verùm quantum difficultatis hæc opinio involvat, omnibus, quos non in totum occæcavit veterum opinio & auctoritas, facilè palam fit : Annon in senibus temperamento frigidis, mulieribus phlegmaticis, frigidiori temperie imbutis, aliisque calculos generari, quotidiana docet experientia ? Vid. Hipp. Sect. 3. Aphor. 31.

Instant porrò : si viscosa & lenta materia fornacis calore in tam duram & lapideam materiam indurari potest, quidni materia viscosa in calculum P. N. calore in corpore indurabitur ?

Respondemus primò, an ullus mortalius tantum in suo corpore calorem, ac quidem fornacis, tolerare potest, qui,  
ante-



antequam talis viscosa materia in tam duram materiam compingatur, requiritur ?

Secundò : an idem calculo, qui urinâ submergitur, obvenit quod lateribus, qui candentissimo exiccantur furno ?

Si à modico tantùm calore gignerentur (uti quorundam est sententia) aquâ iterum solverentur, sicuti videmus lutum, modico igne siccatum, si humore iterum imbuatur, solvi.

Si à calore, febres exinde continuæ, symptomaticæ, habituales, ut ita dicam, & morasmodeis sequerentur.

Minimè licebit in eo refugium quærere, quod tamen intensus hic percipitur calor, cùm ille calculum non præcedat, sed occasionaliter ab eo oriatur, prout videmus in digito calorem à spinâ infixâ, non autem spinam ibidem à calore fieri.

ARTIC.



## ARTIC. VII.

**V**elle hic varias illas tot dissentientium authorum opiniones recensere, superfluum esset; dum quidam à frigoris excessu (quàmvis in corpore, partibusque sat calidis) concreescere, & glaciei instar congelari calculum putent.

Alii ad asylum illud occultarum qualitatum confugiunt.

Quin & nonnulli, qui ab hisce vocibus magis abhorrent, Spiritum quendam salinum, lapidificum, & urinæ naturalem terram volatilem, ut vocant, constringi, & ita ens quoddam novum, DUELECH Helmontio vocitatum, in renibus vesicæve produci, contendunt, eodem plane modo, quo ligna, stirpes, animalia, aquis quorundam fontium immissa, in lapides converti dicuntur, & integras peditum equitumque turmas (si historiis habenda fides) quibusdam in locis, à spiritu quodam è terra expirato in saxa diriguisse testantur, dum interim non vident, spiritum illum lapidificum & penetrantem (si talis in urina detur) non tam in ea calculum producere, quàm potius ipsos renes reliquumque corpus lapideâ naturâ imbuere, atque adeò non secus ac in exemplo allato, in saxum mutare debere.

Nobis

Nobis in præsens suffecerit paucula hic addere, & hujus rei causam simplicissimam, ac quàm maximè intelligibilem (salvo interim rectiùs sentientium judicio) breviter ob oculos ponere.

## A R T I C. VIII.

**N**Otum est ex urinæ analysi è variis eam concinnari partibus.

Præterquam enim quod magna hîc reperiatur aquæ copia, quæ urinæ basin constituit, & bilis pars modica, aureum illum, seu potius corticis citri similem colorem ipsi impertiens, quin & materia pituitosa, superficiei ut plurimum innatans, matulæque adhærescens, & coronam faciens, adest etiam præterea & salina & terrestris quædam portio, quæ ex alimenti necessitate urinæ permiscetur, ac ex sapore & contentis ipsi inesse deprehenditur, inque omni urina naturaliter hospitatur.

Pars itaque hæc terrea crassa & minùs agitata (quam materialem calculi causam constituere volumus) cui & forsan ad majorem spissitudinem, salis modicum admiscetur, sive è viscerum chylicantium aut chymificantium aliquâ labe, *major* copia in corpore luxuriat, aut reliquis corporis partibus minùs bonè sit permixta, sive

sive eadem ex nimia ipsius in assumptis  
 ubertate (qua plurima alimenta scatere  
 necesse est) in ventriculo non benè subigi  
 aut secerni possit, indéque cum chylo per  
 intestina transeat in venas, & cum sangui-  
 ne per cordis ventriculos in arteriam aor-  
 tam delata, emulgentem, ut vocant tan-  
 dem subeat, ibi tum illa in minutissimis  
 illius arteriæ ramulis extremis, aut carnē  
 iis proximā, vel si carunculas, papilla-  
 rum in modum extuberantes egredi ad-  
 huc valeat, in tubulis aut pelvi subsistit,  
 facilè hæret, contiguum ac demum con-  
 tinuum evadit, & in exiguum primùm  
 particulam (quam cum Fernelio nucleum  
 vocare licebit, & majoris calculi rudimen-  
 tum esse cum eo credimus) ibidem abit,  
 quæ deinceps, allabente magis ac magis  
 simili materiā, novoque pabulo, cortica-  
 tim indies accrescit, donec tandem inter-  
 cedente nullo glutino, præter immedia-  
 tum illum minimarum partium cum qui-  
 ete contactum, fiat lapis, ex multis ve-  
 luti laminis coagmentatus, non secus ac  
 in cœparum putaminibus videre est, ut  
 & in ipso lapide Bezoar, qui ex multis  
 quoque tunicis contexitur, & ita sensim  
 augefcit uti curiosis rerum indagatoribus  
 constat.



## ARTIC. IX.

**A** Renosa illa & calculosa renum constitutio, quam urget Fernelius & plurimi cum eo, qui in ejus castris versantur, si benignâ interpretatione uti hic volumus, concedi quodammodo posset, intelligendo per eam non occultam quandam, & à causis illis manifestis diversam (quam nonnulli fingere volunt) vim lapidificam, verùm potius pororum, & forsan etiam vasculorum minimorum, quæ in renibus sunt & per quæ urina transcolari naturaliter debet, majorem angustiam, sive ex primo ortu talem quis nactus fuerit, quo & hæreditariam calculi dispositionem maximè referimus, sive progressu ætatis per res non naturales vulgò dictas, eam fortatur: credi enim facile potest, *materiam* \* *illam minùs mobilem & agitatam*, cùm crassa omnino sit terræque indolis,

---

\* Podagrici renum calculo quamplurimi affliguntur, ex eo quod parùm sese moveant, & diu supini recumbant, tum etiam quod feriantur Organa secretoria à debitis sibi functionibus; sive etiam quod calculus ejusdem materia morbifica in genere portio quædam sit. Quandoque etiam Calculus lotii per meatus urinarios in vesicam transitum impediens, agrum de medio tollit, lentas Podagræ moras non ampliùs expectantem. Sydenham. Tract. de Podagr. p. m. 22.



quoties meatus, per quos transitum ipsi patere necesse erat, angustiores offendit, faciliùs subsistere (hujus rei vulgare exemplum est in præparatione butyri, ubi solâ agitatione butyrum à sero lactis ideo separatur, quia butyri particulæ minùs aptæ sunt ad motum quàm feri; talem quoque in musto separationem fieri ingeniosissimus Carthesius in princip. Philosoph. part. IV. p. m. XIV. doctè admodum docet) tandèmq; progressu temporis eo quo diximus modo magis magisque accrescendo in plenum lapidem formari.

#### ARTIC. X.

**D**E lapide vesicæ, cujus generatio à prioris formatione haud differt, nulla nobis superest difficultas, nisi quod notemus, eum non semper in vesica ortum ducere, sed quandoque renibus rudimentum suum debere.

Triennio abhinc nuper elapso, à puero quodam *duos eduximus calculos*, & cùm ulteriùs inquisivimus an aliquis in vesica calculus superesset, nullum invenimus: biduo post calculus tertius è vulnere erupit, continuis interea doloribus & insomniis molestabatur puer, ità ut vomitu, febre continuâ, diarrhœâ, & id genus sym-

ptomatibus affectus, tandem expiravit; Quem cum dissectum inspeximus, *pelvim renis dextri variis calculis invenimus impletam*, & ureterem, tenui cuidam intestino proportionem simul & cavitatem similem, offendimus.\* Sed ad scopum, Calculus in tubulis aut pelvi, & nonnunquam minutissimus in ipso renum parenchymate concretus, ureteris canalem permeans, cum in ejus extremo intra vesicæ duplicaturam angustias illas perreptat, hæere quandoque potest, suâque præsentia cavitatem istam opilans, cum tenuiorum & lubricarum magis particularum transitum impedire vix queat, crassiores retinet, auctusque ita vesicæ tunicis quàm firmissimè sæpè annectitur, calculumque secundarium (si ita appellare fas est) in ea parit, idem fieri posse in ipso vesicæ cavo credimus.

Si enim calculus renum minutus, sic satis angustiorum illum, quem diximus, tramitem subierit, in amplo detentus, quoties per urethram non ejicitur, ob con-

---

\* Paulo post D. Jacobus Babington, Chyrurgus inter primarios apud Londinenses in nostra præsentia unum calculum (qui unciam unam pendebat) & vesica Nepotis emortui, duodecim vero alios & renum parenchymate ut & ureteribus notabilis figuræ eduxit.

tinuam novæ materiæ appositionem, eo quo dictum modo augmentum suum acquirit.

Quod ad calculum vesicæ primarium, uti appellant, non est quod aliquid insuper addamus, cùm eandem cùm renum calculo & efficientem & materialem causam agnoscere, nec in ullo, præter subjectum differre, statuamus.

Subit tamen nonnullos admiratio, quo pacto in medio illo urinæ fluvio, cujus ope dissolutionem calculi promoveri potius debere putent, lapis formari queat (quo & forsan inductus Fernelius omne lapidis rudimentum à renibus derivat) sed mirari facile desinent, si unquam in maris fluminumve ripis, ubi continuus tamen aquæ est affluxus, tophos istos, & perfectos quandoque lapides, calculis qui in corpore formantur, haud dissimiles, concretos viderint.

## ARTIC. XI.

**C**ausæ remotæ & mediata, quarum ope materia calculosa massæ sanguineæ & renibus communicatur, sunt intemperantia & victus ratio inordinata, nam sola ingluvies, ut in pueris, sufficit ad materiam calculi procreandam.



Non rarò enim evenire solet, ut per illam, affluente per tot vasa humorum copiâ, impletis supra modum glandulis, porisque chylum deferentibus, obstructis aut compressis, publica coctio detrimenta plurima capiat, aut colluvie corruptorum putrescentiumque succorum facta, lentarum febrium & contumacium affectuum aliorum in mesenterio stabulum deprehendatur.

Per hanc vero colluviem non solum totius corporis intemperies, sed & mala organorum constitutio inducitur, materia calculi generatur, ventriculus debilitatur, ejus fermentum spirituosum extinguitur, ructus acidi, fluctuationes & murmura ventris oriuntur.

Sub tali victu comprehenditur panis non benè fermentatus, neque mediocri igne in clibano excoctus.

Caseus, qui difficulter concoquitur, ructus acidus & flatu copiosos generat, vix ostiola chylo ex intestinis per lacteas venas trajiciendo data subintrat, obstructiones parit, & sanguinem lentore imbuat, sale suo terreo calculum generat. Hoc effato, viris robustis, sanis & assuetis, quorum res domestica vitam medicam non patitur, nullas leges impono. His potius (quia *Τὰ ἐκ πολλῆς χρεῖν σώματα, καὶ ἡχέτω τῇ ἀσυνήθῳ ἐνοχλεῖν εἶναι.*  
Hippocr.



Hippocr. Sect. II. Aphorism. L. aut quia consuetudo est altera natura) caseos præstantiores, Anglicos qui de Chidder dicti sunt, Hollandicos, Helveticos, Sanenses, & alios plures, habito moderamine, commendo.

Caro bubula, suilla, caprina, quæ multum nitri in se habent, salita & fumo indurata, quæ difficillimè coquuntur, & terreum chymum post se relinquunt.

Anates, anseres, atque aliæ aves lacustres, quarum carnes superfluitatum & excrementorum productrices sunt.

Hisce adde omnia legumina, olera cruda, triticum coctum, & oryza, nisi misceantur incidentibus & detergentibus.

Ova indurata, pyra lapidosa, tubera, corna, mespila & similes fructus crassioris & austerae naturæ, quia vias nimium coarctant, & succum valde crassum suppeditant. Aromata etiam acriora, ut : piper; zinziber; cubebæ, nec non sinapi.

Inter potus genera, renum vesicæ calculum producere apta sunt, cerevisia recens, lupulata nimium, nam ipsa alnus in labris amplis æneis cerevisiariis una cum lupulo cocta, atque ubi exempta fuerit, per triennium glarea in cellis obruta, in lapidem durum, non injucundo spectaculo, convertitur, è quo potissimum coctes fiunt, quibus ad acuenda instrumenta

anatomica utimur. • Gesner. Item cerevisia dulcis, crassa & non fermentata, aqua crassa, palustris, è glacie aut nive liquata, excellenter sapida, ni consuetudo adfuerit, quæ loci naturam per quam fluit, arguit, virésque mineralium, aluminis, sulphuris, ferri, similiúmque secum vehit; & propterea non pro potu simpliciter, sed medicatío est habenda; Frigidæ potio à labore sudanti est adversa.

*Vinum pro potu ordinario sumptum cotiones non promovet, sed potiùs subvertit, nisi in diu Vino assuetis, ut Gallis quorum tamen perplurimi calculo laborant. Calorem quidem aliqualem in transitu impertit, fermenta tamen corporis ab eo subjugantur, & spiritus naturales avocantur fuganturque: unde bibaces frequenter calculo, podagrâ, paralyfi, hydrope, aliisque morbis frigidis serè perimuntur. Sydenham. Materiam igitur calculosam promovent.*

Vina rubra, turbida, dulcia, Moravica, Hungarica, Cretica, Italica, Malvatica, Hispanica, in quibus tartarus salinus tam amicâ societate jungitur, ut serè nunquam illa deferat; sed omnia vasa humani corporis permeet, renibus & articulis adhæreat, tophos calculósque procreet.

In vino enim occurrit crassior quædam substantia, quæ vasorum lateribus tractu temporis adhærescens, tartarum dicitur, quod

quod quia in vino rhenano magnâ copiam reperitur, multum nocumenti illinc oritur.

Verum crassius illud tartarum non solum calculum generat, sed illud etiam quod superest in vino præter aquam & tartarum, & spiritus vocari solet à quo vinum omne suas vires accipit, quod exinde constat, quia vina Austriaca minus tartari contineant, quàm rhenana, plus tamen noceant, neque hoc mirum est, quoniam spiritus vini nihil aliud est, quam tartarum in sua principia resolutum, constat enim spiritus hic paucò oleo, multo acido & sale volatili, unde etiam spiritus vini tartarizatus longè potentior est spiritu simplici. Atque hinc etiam ratio petenda est, quare spiritus vini, & plerique potus generosi, calculi productionem promoveant.

## ARTIC. XII.

**P**Ræter cibum & potum *reliquæ res* non naturales dictæ, calculi generationem promovent.

Non satietas, non fames, neque *aliud quicquam*, quod modum naturæ excessit, bonum. Hip. Sect. II. Aphor. IV.

Nimia studia & curæ huc quoque revocanda sunt, Veneris denique immoderatus



tus usus maximè noxius est, dubitari autem potest qua ratione noceat; Inest enim nobis (secundum Hippocratem) salsum & acre, &c. *quod* in nobis immodico usu veneris acrius redditur, ità ut primum non tam copià quàm viribus augeatur. Quod enim dulce est in sanguine, seu pingue, partim cum spiritibus, partim cum semine consumitur, quod autem reliquum est magis magisque exacerbatur, atque ità seorsim magis existens, vires sumit atque nocet.

Hisce adde motus immodicos statim ab assumpto cibo; saltationes, equitationes, pugillationes, &c. quibus borborygmi in ventriculo excitantur, concoctio impeditur, crudus chylus à ventriculo evocatur, calorque ad extrema pellitur.

Otium nec minùs nocet, quàm nimius corporis motus, vires corporis eo quasi suffocantur, retenta intus materia, unde videmus ignavos homines & pinguescentes, illòsque *qui vitam sedentariam degunt, sæpius calculos colligere*, quam ob causam Calculus Podagræ ferè individuus comes est.

Itinera hyemali tempore per loca nivosa & alta, notum enim est iter facientes, imprimis sine cibo assumpto, hyeme præcipue, in Bulimum incidere, variisque postea obstructionibus obnoxios esse.

Alvi



Alvi facès & urina retenta quæ plurimas cruditates in corpore cumulant, calorem obtundunt, noxios halitus producunt, ipsūque adeò calculum compingunt : hanc rem ex adverso illustrat exemplum Hispanorum, qui magnam partem arenularum cum urina excernunt, & ob id neutiquam lithiasi sunt obnoxii. River. de calculo vesicæ.

Affectus animi vehementiores, imprimis tristitia, ira, & metus.

Tristitia sensim & paulatim vires dissolvit, corpus refrigerat & siccatur, concoctionem impedit, austerum copiosius ingerit, humores noxios inducit.

Ira febres accendit, bilem movet, & spiritus exagitat.

Metus vero acidum cumulat, vires dissolvit, vitalēque effervescentiam minuit. Boetius eleganter cecinit :

<i>Gaudia pelle,</i>	<i>Nubilā mens est</i>
<i>Pelle timorem,</i>	<i>Vindictaque frægis,</i>
<i>Spemque fugato</i>	<i>Hæc ubi regnant.</i>
<i>Nec dolor adsit,</i>	

Tandemque etiam hæreditaria (hæreditario quasi jure) ad generandum calculum dispositio, ex semine & sanguine materno derivata, quæ in facultatis expulsi-væ imbecillitate, & potissimum in nativo quodam sanguinis vitio consistit.

Astro-

Astrologi hæc insuper causas è Cœlo ex conjunctione nempe Saturni cum Mercurio in domo octava petitas addere solent, qua natum infantem calculosum esse prædicant, an verò astrorum ille influxus tantum in corporibus nostris causare valeat, peritioribus. æstimandum relinquimus.

### ARTIC. XIII.

**C**Alculorum differentias si spectemus, variæ sunt, & diversimodè distinguuntur ut paginâ aversâ demonstratur; ratione enim quantitatis,

Calculus { Magnus } dicitur.  
                  { Parvus }

Ratione numeri calculus est vel unus vel plures. E vesicâ calculum per Lithotomiam sæpius extraximus unum, aliquando duos vel tres, Anno proximè elapso, 1685. die 27. Maii è vesicâ Jacobi Whitaker, qui annum ætatis suæ agebat sexagesimum septimum (in præsentia celeberrimi Viri Richardi Lower, in re Medica optimè meriti, & inter primarios numerandi) XLII. calculos per operationem Lithotomicam extraximus quod nobis

bis instar miraculi apparuit. Diversam illorum figuram atque magnitudinem in tabula annexa, delineatam videtis.

Respectu autem coloris, calculus est ruber, flavus, cineritius, nigricans. Colorum hæc diversitas dependet ab externa ejus apicum coëuntium figura, vel ab extranea materia simul petrificata, ut à purè, sanguine, glutine ortum habet.

Respectu etiam figuræ, rotundus, oblongus (qualem è nobilissimæ Comitissæ hujus regni Filio, præsentibus aliquot eximiiis Medicinæ Doctoribus multum mihi honorandis, nuperrimè eduximus) angularis, triangularis, quadrangularis, ad latera compressus, dici potest.

Superficies vero variè figurata, vel casui, vel motui, vel vicinarum partium situi debetur, hinc rotundiores calculi vesicæ debentur, oblongiores verò ureteribus, aliqui etiam cavitatem pelvis renum exactè referre videntur.

Præcipuæ tamén differentiæ sunt, quæ vel à subjecto desumuntur, inde renum vel vesicæ calculi dicuntur, vel à materia, quæ vel tenuior vel crassior est, & quatuor gradibus ascendit & ità distingui potest.



Vel enim { arenulæ  
 fabulum  
 tophus  
 lapis } appellantur

1. Arenulæ sunt quæ solâ magnitudine à calculo differunt, & in renum poris minutas formas recipiunt, quæ (ut ait Fernelius) mutuo adhæsu inter se colligatæ calculum coagmentant atque compingunt.

2. Sabulum, quod ex arenulis cum mucō coagulatis, ortum habet.

3. In loco succedit tophus, qui calculi formam habet; & quamvis arenulis sit major, est tamen mollior & magis friabilis.

4. Denique loco sequitur calculus propriè dictus, qui lapis est solidus, durus, atque etiam perfectus.

Qui calculus ideo durior, ob majorem salinæ & terrestris materiæ copiam compressiorem, & exactius petrificatam, mollior autem calculus è contra.

## ARTIC. XIV.

**S**IGNA calculi renalis pathognomonica licet propriè nulla dentur, sed æquivoca sint, aliisquæ morbis communia, illa tamen quæ majori ex parte diagnosis ejus faciunt, ex praxi sequentia observantur.

I. Dolor circa regionem lumbarem fixus omnino & stabilis, obtusus quidem, & gravantis ponderis sensum inferens, cum in ipso renum parenchymate, obtusiore utpote sensu donato, calculus stabulatur, at ubi in caput ureteris sese insinuat, acutus, lancinans, omniumque crudelissimus.

Quinque jam annis circum circa elapsis, ægrotus quidam Ischuria laborans, consilium nostrum imploravit (urinam nullam emittebat) nisi quod vomitu sursum excernebatur, (urinalem quoque odorem exspiratio præ se ferebat) quo continuato maximè debilitatus fuit, consultis aliis non imæ notæ Medicis, multis remediis usi fuimus, sed frustra, vitam tandem cum morte mutavit; corpus ejus cum dissectum fuerit, pelvis renis dextri majori calculo fuit oppleta, cujus pars inferior, papillæ in modum protuberans, ureterem omnino

omninò obstruebat ; capiti ureteris sinistri acutus calculus adeò exactè erat infixus ut renes utrique suo officio fungi neutiquam potuerint, atque adeò expiravit.

2. Spinam inflectendi difficultas, compressis scilicet distentisque ejus nervis aut musculis.

3. Calor lumborum molestus prorsum.

4. Stupor femoris crurisque è directo, ob compressionem (à calculi grandioris pondere) musculi, & dicti, vel nervi in omnes crurum musculos divaricati.

5. Testiculi retractio è regione affecti renis, ob vasorum (quæ à renibus ad testes vergunt) versus superiora adductionem.

6. Nausea & vomitus, propter consensum scilicet renum cum ventriculo, qui sit non tam mediante, ut volunt, peritonæo, cujus membranam utrumque viscus participat, quàm quidem ob communem illum nervulum, à stomachico sexti paris ramo, in propriam & interiorem renum tunicam implantatum.

7. Urina



7. Urina plerumque cruenta, laceratis apertisque à calculi asperioris attritione, venulis, per renis substantiam dispersis, quin & quandoque, præsertim circa initia, tenuis, aquosa, & parvâ copiâ prodiens, propter renis à calculo obstructionem, quoties verò per ureteres in vesicam demittitur, urinæ crassæ, turbidæ & aquosæ ut plurimum excernuntur.

8. Calculos per urinas excretos, ut & arenas (non quæ vasorum lateribus adhærent, sed quæ statim matulæ fundum petunt) unde ægroti notabile levamen sentiunt, inter præcipua signa recenseri vellem.

Sed quia tanta est similitudo nephritidis cum dolore colico, ut non solum sæpiissime empiricum, sed & Medicum rationalem falli contingat, distinctionis ergo hæc signa notari vellem.

Si supra renes sit dolor, non ad renes sed ad intestina pertinet.

Dolor Nephriticus extrorsum vergit, nec ab eo loco unquam discedit, nisi cum tophus, è nido suo excussus, delabitur in ureterem :

Colicus verò sæpiissime peregrinatur, locum mutat, & per omnem intestinorum circuitum oberrat, inq; pectinem declinat.

E

Nephti-

Nephritici à sumpto alimento melius, colici verò pejus habent.

## ARTIC. XV.

**C**Alculi, qui in vesica hæret, signa, hoc modo recenset Hippocrates, lib. 4. de morb.

Ubi mingere vult, dolore affligitur, & urina paulatim fluit, velut in urinæ stillicidio & est subcruenta, nimirum vesica à lapide exulcerata, & vesica inflammata est. Verum hoc signum inconspicuum est, indicat tamen summa pars præputii.

Quandoque mingit arenosa.

Pudenda fricant & trahunt pueruli calculosi.

Cùm verò hæc signa aliquantulum sint obscura ea paulo fusiùs cum aliis circumstantiis & signis exponam, ut in casu tam difficili veritas rei magis appareat.

1. In principio, cùm calculus adhuc minor est, fit, ut calculosus, excretâ jam urinâ, obtusorem dolorem in glande sentiat, qui dolor à glande per urethram vergit ad vesicam, eodem modo ac si stranguriam pateretur. Asperitate enim suâ, quamvis calculus minor sit, vesicæ tamen cervicem pungit, adeoque dolorem

rem glandi infert, qui dolor à glande re-  
vertit ad vesicam.

2. Calculosus anteriorem virgæ par-  
tem ferè semper, præcipuè verò urinam  
redditurus, digitis fricat, comprimit,  
trahit, ac mulget, & hinc fit quòd in-  
fantes calculosi semper manum brachis  
admoveant, & vellicando membrum vi-  
rile, dimidia ferè parte solito longius fa-  
ciant.

3. Si gravior sit calculus, dolorem  
tunc gravativum sentit calculosus, ac si  
grave quoddam pondus infimo ipsius ven-  
tri ac intestino recto inter ossa pubis in-  
cumberet, eaque deorsum deprimeret, do-  
lorem patitur tunc præterea circa umbili-  
cum, quia fundo suo per urachum umbi-  
lico jungitur vesica.

4. Si calculus meatum urinarium non  
omninò obstruit, natura ad expellendam  
urinam sæpiùs irritatur, sed frustra; ali-  
quando effluit paululum; aliquando con-  
tinuò nolenti volenti urina emittitur;  
dolore interim semper ægrum affli-  
gente.

5. Sursum elevatis pedibus, capite ad  
terram demisso, sæpiùs evenit, ut calcu-  
lus



lus ad vesicæ fundum delabatur, urinaque liberiores exitum nanciscatur.

6. Extra paroxysmum videmus non raro calculo afflictum crura sua transversim complicare, eo enim modo calculus aliquo modo è collo vesicæ sursum elevatur, ità ut urina exitum liberiores habeat.

7. Urina detenta, acris & ardens, præ doloris magnitudine, quam excitat, spiritus ad virgam allicit, sicque virile membrum in infantibus æque ac adultis, tenditur & erigitur, non ex venereo quodam appetitu & libidine, ut alias quis crederet.

8. Ex consensu sphincteris ani & vesicæ, ob nervorum, quos ab uno ramo recipiunt communionem & colligentiam, *simultaneos desidendi meiendique calculo affligit habet conatus.* Sed irrationes illæ frustaneæ sunt, & si quid excernatur, parum est, idque cum cruciatu; in infantibus sæpius summus fit intestini recti prolapsus.

9. Calculosi plerique continuò sitiunt, & sæpius multum potum appetunt, quia, quamvis parum urinæ singulis vicibus excernunt,

cernunt, ob frequentem tamen ac crebram excretionem multum urinæ emittunt, & sic serum sanguinis absumitur, quod natura quidem compensare, adeoque interiora viscera in conveniente suo temperamento ac symmetria naturali conservare studet: ob continuos porrò dolores, vigiliæ & inquietudines oriuntur, falsum in illis acrius redditur, sanguinis etiam massa magis indies incalescit, undè multum ac crebrum refrigerium requiritur; aliquando etiam IctERICI, Hydropici, similisque affectus sequuntur.

10. Ab opiatīs assumptis melius sese habent calculosi, à diureticis verò potentioribus in pejorem vergunt intemperiem.

11. Hippocrates (Aphor. 79. Sect. 4.) vesicam calculo laborare ex urinis hoc modo judicat *Ὀνόστιον ἐν ἕρῳ ψαμμόδα, &c.* Joh. Zechius in Consult. Med. libr. consult. 58. per *ψαμμόδα* intelligit sabulum crassum, cænosum excrementum (narium veluti mucum) matulæ fundo tenaciter adhærescens, quod calculi majoris in vesica, & diu illic concreti signum est pathognomonicum.

12. Certum est cùm digitum in anum puerorum intrudunt, vel catheterem per urethram in vesicam aduultorum immittunt, & explorant sæpiùs, calculus an sit, vel quoduplex sit, magnus an parvus, unus vel plures, multum enim interest Medico hæc exactè novisse.

Huc quoque causarum antecedentium consideratio spectat, nim: temperamenti, diætæ, quam habuit æger, symptomatum quæ subiit; sine dubio enim crudelem fuit passus dolorem, si calculus sit magnus, durus, & inæqualis, porrò an sacculo inclusi sint calculi, & vesicæ membranæ cum eo adhærescant, cognitu quamvis sit necessarium, difficillimum tamen, nisi cathetere vel digito investigetur. Diagnosticis itaque signis breviter hoc modo examinatis, ad prognostica progredimur.

## ARTIC. XVI.

**P**ueri, inquit Hippocrates 6. Epidem. maximè vesicæ; senes renum sacculo magis sunt obnoxii. Et aphor. VI. Sect. VI. renum & vesicæ vitia in senibus difficulter sanantur.

Lithiasis à parentibus in sobolem, primigenia feminis labe, omnem fermè, quamvis alioquin generosissimam spernit  
elu-



eludítque medicinam tam prophylaxeos quàm curationis ergò adhibitam, unde Aretæus multò difficilior esse putavit, renes aut vesicam, dispositionibus calculi obnoxia, artis beneficio ab illis generandis impediri, quàm uterum fœcunditate luxuriantem à concipiendis fœtibus.

Vesicæ calculus pharmacorum respectu curatu difficilior quàm qui in renibus est; si verò chirurgiam spectemus, longè sæpè faciliior; aliquando tamen, doloribus ad spinæ musculos extra vergentibus abscessu factò, illac calculos excretos, & ulcus consolidatum fuisse, constat. Calculus vehemens & periculosum est malum, inflammationes, exulcerationes, dolores atroces, vigilias, febres, urinæ suppressionem, aliâque gravissimâ symptomata inferens.

Si calculus non sit magnus sed parvus, non in corpore cachexia, nec humorum ad calculum generandum magna copia, si non hæreditaria ad illum dispositio, bona, contraria verò si adfuerint, mala exinde prognosis haurienda est.

Si calculus sit satis magnus & durus, æger operationi chirurgicæ, quamvis periculi plenæ, si ab eo liberari velit, sese subjiciat, necesse est.

Quod si lapis sit inconsuetæ magnitudinis & ponderis qualem (utpote hîc delineatum videtis) in plurium præsentia eduximus è cadavere N. L. juxta Nosocomium S. T. qui 19 uncias & tres drachmas pendebat, tales pro desperatis habendi sunt, & minimè, dum vivunt, attingendi.

Qui calculum sive folliculo inclusum, sive solum, vesicæ membranæ tamen annexum in suo gestat corpore, in eodem prædicamento versatur, ut & senes debiles, pueri & infantes, minori ætate, sed infirmi.

E contra, si vires consent ægris, viscera benè sint disposita, calculus non sit nimis magnus, quamvis sint plures, implorato Dei auxilio, operatio animosè aggredienda, & de ejus successu benè sperandum est.

Feliciùs & securiùs ejiciuntur & extrahuntur calculi in mulieribus, quàm in viris, quia brevem & amplum habent urinæ meatum.

## ARTIC. XVII.

**H**isce nunc, ad calculi theoriam facientibus, propositis & præmissis, pergimus ad illa, quæ ex praxi, curationis nempe fonte, tum ad imminentem hostem avertendum, quam præsentem extirpandum afferri possunt.

In iis methodicè peragendis, triplex nobis occurrit sollicitudo.

Prima ut causæ, ad calculi generationem quovis modo efficaces, tollantur, atque ità ejus generatio & augmentum diruatur.

Altera, ut calculus jam genitus deturbetur.

Tertia denique ut symptomata, dolor ille immanis demulceatur, & mingendi difficultas, quæ socia hic adesse solet, propulsetur.

Hæc procurabuntur medicamentis selectissimis ex fonte diætetico, pharmaceutico & chirurgico desumptis.

ARTIC



## ARTIC. XVIII.

**I**N præcautione laborandum primò, ut materia remota, dictâ sc. artic. II, 12, inter causas dictâ, sedulò vitetur, & è contra *victus ratio conveniens in usum trahatur.* Utendum igitur cibis qui sunt facilis digestionis, parùmque excrementi suppeditant, & attenuandi & incidendi vim habent.

Huic scopo accommodata sunt juscula vervecum aut caponum cum cherefolio, acetosâ, hordeo & similibus, præsertim vere decocta. \*

Et si in morbo aliquo summa sobrietas & moderatio, in hoc, adhibenda est, *Illud quod medium est, atque inter utrumq; probatur.*

Quin & animi pathemata sic moderanda, ut nullum ex illis excessu suo corpori noceat.

---

\* Assumant prandium sed non cœnam, haustum cerevisiæ alicujus tenuioris liberaliorem sibi indulgeant, concretio enim calculi à liquore ejusmodi hoc tempore hausto multum impeditur, refrigeratis scilicet ab eo renibus prolatisque. Sunt verò Sydenhami.

## ARTIC. XIX.

**P**rogređimur jam ad materiam proximam, crudorum ſcilicet craſſorũque humorum ſaburram, ex inordinata diæta, aut aliã quavis cauſã imprudenter in corpore genitam, quã, ne ad renes delabatur, revellenda & evacuada, quem in uſum cathartica exhibere utile erit, ut ſunt Manna, caſſia, diaprunum, &c. *Calculi enim Materia quò diutius ſanguine reſeſatto circulatur, eò magis ad cohæſionem tendit.* Liſter de Fontibus Medicatis Angliæ.

Vomitus quoque ſæpiùs iteratus conducit (maximè in iis qui comparati ſunt ad vomendum, quique magnas primæ coctionis cruditates perſentiunt) qui ſe  
\* ſponte obviuſ, medicamentiſ ad hanc rem accommodatiſ utendum.

Eò enim mediante noxiuſ in corpore collectuſ humor feliciffimo ſæpè cum ſucceſſu educitur, & ne ad renes irruat, protinuſ revellitur.

---

\* Vomituſ in Nephritide ab arenuliſ vel calculiſ nihil tantuſ flagitat quàm prelargam revulſionem per phlebotomiam, nem Enemata, Emollientia, Diuretica & Lithontriptica. Sydenham.

Si tamen quid istiusmodi materiæ ad renes irrepserit, confestim diureticorum ope excutienda erit.

Huic autem scopo prævalet Therebinthina, & ex ea parata Medicamenta. Amatus Lusitanus refert de monacho quodam, Nephritide & Arthritide maximè afflicto, qui ejus usu ab hisce morbis liber evasit. Egregium ejus præparandi modum ex Lev. Lemnio adfert Clarissimus Beverovicus in suo de Calculo Tractatu.

Vinum album gallicum generosum ignitis silicibus sæpius affusum, maximè materiam tartaream, antequam concreascit in lapidem, è renibus expellit.

Quin & aquæ minerales, hæc apud Anglos Tunbrigenses, apud Nostrates Spadanzæ plurimum conferunt, quia incidente, dissolvente, & abstergente virtute sunt præditæ.

Balneum aquæ fluvialis, corpore ad ultra lumbos usque ei immisso, arenularum evacuationem, antequam lithescant, promovet, maximè si pridie præmittatur catharticum aliquod appropriatum, & eadem balnei die specificum aliquod diureticum susceptum fuerit.



## ARTIC. XX.

**A**lter in curando scopus est ut calculus jam genitus deturbetur.

Prospiciendum tamen hîc benè, quòd si calculus major in renibus hæreat, protrudendus omninò non sit, sin minor & in sinu potissimum, excludendus quanto-cyùs.

Protrusus enim grandior calculus in ureteres, atrocissimo illo, qui comes sequitur, dolore, motus sæpè convulsivos & animi deliquia parit, adeò ut nisi dolor tam per intrinseca remedia; quàm fomenta externa citò mitigetur, æger quandoque pereat.

Antequam verò minor calculus deturbetur, præmittenda enemata, quæ vias, per quas ipsi transeundum est, emolliunt & lubricas reddunt.

Quem in finem HENRICUS IV. Galliarum Rex sæpius bolum assumpsit ex butyro recenti non salito, & saccharo candi mixtis, superbibendo haustum vini oligophori.

Alii laudant ol. amygd. dulc. vel olivar. cass. ex fistula suctam, & juscula pinguis largiori haustu sumpta, &c.

Clyf-

Clysmata, malactica dicta (quæ vel ex herbis, vel radicibus emollientibus parantur (additis quandoque diureticis) vel ex puris oleis fiunt, ut ol. chamomill. lilior. amygd. dulc. &c.) summo cum levamine præscribunt Medici: unde repetita injectione renalem dolorem mitigari voluit Avicenna.

Externè cataplasmata, etiam ex emollientibus confecta, applicant, ut & varia fomenta ex similibus parata, quibus refrigerantia connectunt, ne dolores intendantur.

Item ol. amygd. dulc. & scorp. cum ung. Alth. pro linimento adhibent.

Balneum quoque aq. dulc. cum herb. emol. additis iis, quæ calculum frangere dicuntur, efficacissimum ad vias relaxandas esse remedium, plurimis constat.

Hisce peractis ulterius medicamenta præscribuntur lapidis motum juvantia, qualia sunt omnia, quæ urinam movent, & propriè diuretica dicuntur, quorum ingentem catalogum cum apud Authores reperire sit, ejus recensione supersedere libet.

Addere tamen & his, metu doloris, anodyna solemus, atque etiam, nequid incoctum in primis viis hærens ad renes deferatur, alviduca brevi antea porrigimus.

Quod

Quòd si hæc methodus calculum jam genitum non deturbet, utpotè in cæteris, sic quoque in hoc casu, extrema remedia erunt utenda, vomitorium nempe præscribendum.

Hac enim ratione inferiora omnia quam maximè premuntur, quæ nullis medicamentis antea sumptis, expelli poterant; notandum tamen specifica diuretica vomitoriis esse addenda.

## ARTIC. XXI.

**I**N grandiori calculo, cùm protrudi eum non licere, supra dictum, quid faciendum sit, dictu restat.

An in rerum natura dentur remedia quæ lapidem durum perfectè dissolvant, multi disputant, totisque viribus strenuè inter se digladiantur.

Si calculus sit friabilis, laxioris & mollioris substantiæ, ex muco & arenulis coagulatus, multiplici constat experientiâ quod talis conteri atque diminui potest.

Matthiolum atque Dodonæum virgam auream hunc in finem maximè commendant, chymici sua salia, ut ononidis; miliî solis, cortic. fabar. ut & sal ex ovorum corticibus, sal urinæ, calculi humani lign. junip. fraxin. sal succin. volat. &c.

Palmam



Palnam omnibus præripere videtur illud quod ex millepedibus conflatur medicamentum de quo vide Hartmannum.

Spiritum nitri calculos humanos extra humanum corpus existentes, facilè ad multorum admirationem comminuere, certissimum atque nobis experienciâ comprobatum est.

Si in ipso semine & sanguine menstruo calculosa dispositio latitârit, præter diætâ, cura non est suscipienda pharmacis ullis. Totius enim sanitatis fundamenta in prima conceptione quasi ponuntur, & futuræ sanitatis vel bona vel mala principia in fœtum derivantur.

## ARTIC. XXII.

**A**lteri indicationi satîs fit, si dolor ille vehemens (hominum vera crux & tormentum) mitigetur, quod ferè unâ operâ præstant remedia ad lubricandas vias superiùs præscripta, quæ tamen si frustra sint, in atrocissimo dolore ad narcotica confugiendum, ut, philon. roman. req. Nicol. laud. opiat. &c.

Contigit mihi adesse fœminæ annos ultra quadraginta natæ, summum primo dolorem in lumborum regione, versùs pubem & inguina delatum sentienti: brevi post mictio cruenta & purulenta sequebatur,

tur, urinæ itidem ardor & stillicidium, dolor inter mingendum atrocissimus, simultanei desidendi mejendique conatus, imò sæces involuntariæ aliquando effluebant; diu noctûque cum corporis jactatione vigilabat, inordinatè ad interrogata respondebat: facies ferox, truculenta & oculi fixi astantium animos commiseratione capiebant; ingravescente morbo (plurimis medicamentis, imo & narcoticis, in extremo tanquam casu, sæpiùs, cautè quamvis adhibitis) ægra tandem defuncta est, quam cum dissectam examinavimus, Vesicam urinariam foetidissimo lentoque pure impletam invenimus, rubicundam porrò & ulcere erosam.

Ureteres vidimus solito carnosiores, pure & calculis infartos, dexter quidem calculos quatuor, albidiores, majores, molliores, materiæ subsalsæ, viscidæ & sordidæ conjunctos; sinister autem nigricantes magis, sed duriores minimos in se continebat. Sinistro verò in rene pus cruentum, plurimique exigui calculi, figurâ prædictis in ejusdem lateris uretere hærentibus consimiles, contenti erant, sed ad rem.

Magnas præterea turbas hîc dare consuevit in mingendo difficultas, cui fugandæ tum intus (sed summa cum cautione) diuretica, tum foris linimenta ex unguent.

alth. ol. amygd. dulc. similibusque confecta, ut & fomenta & cataplasmata huic scopo accommodata, adhibemus. Quin & si fortè lapis vesicæ cervici impactus urinæ exitum inhibeat, supino decubitu, cruribusque elevatis, & agitato corpore erit excutiendus, tandè que si nullus indè eveniat successus immisso cathetere in vesicæ cavum erit repellendus.

### ARTIC. XXIII.

**D**iæteticiis itaque atque pharmaceuticis remediis jam breviter excussis, superest ut ultimum illud, scilicet chirurgicum jam exponamus.

Venæ sectionem, si plethora, vel nimius sanguinis æstus adsunt, ex usu posse esse statuimus.

Cucurbitulas in regione lumbari positas, in dolore nephritico calculum unum vel plures ad vesicam derivasse, experientiâ sæpius observatum.

Si vesicæ lapis major sit quàm ut expelli queat, nec defectu requisiti ad id medicaminis resolvi possit, si atrocitas morbi nullis medicamentis succumbat, tunc duriori nodo durus adhibendus est cuneus.



Circulatores plerumque enim omnes  
ridemus hîc & Empiricos, qui calculum  
vesicæ medicamentis ore assumptis terere  
fabulantur: idem evincunt literæ paucis  
jam elapsis diebus ad nos datæ.

F 2

I. G.

I. G. Eques Auratus,  
IOANNI GROENFELDIO, M.D.

S. D.

**C**UM mihi in mentem venit, cum quo  
mihi res impræsentiarum agenda est,  
viro nempe eruditione & experientiâ notis-  
simo, confisus spero, quod non me argues vel  
ingratitude, vel imprudentiæ, cum de  
salute filii sollicitus essem, libentissimè enim  
vellem, ità me movente paterno affectu, &  
naturalis societatis, ut qui Tyrannidem tantam  
subiit, modo lenissimo sanaretur, ideoque  
sanè spes mihi affulsit major, quod inveni-  
quendam (qui Vestras fuit, qui in Arthri-  
tide & Hydrope curandis, & nuperrimè  
quoque in comminuendo calculo, summus vo-  
luit esse mysta, solâ spe lucri, fractis omni-  
bus pudoris repagulis, abenea jam diu fron-  
te fuit indutus) qui affirmavit intra vi-  
ginti dierum spatium se potuisse frangere  
& expellere calculum, per medicamenta in-  
tus assumpta, etiamsi calculus tantus esset,  
ut pugni magnitudinem excederet: sed ah!  
quanta

quanta de spe decidi cum filio meo, cum fallacia & impudentia ignorantis Empirici miserè fallebamur, & filius meus adhuc subit torturam calculi gravissimam.

Ad Te itaque, tanquam ad asylum, confugio, opem implorans vestram, ut tentares an calculum in vesica concretum invenire possis, & si invenias, ut eandem adhibeas curam, quam (cum bono Deo) habuisti, respectu fratris ejus Senioris, quem biennio abhinc per Lithotomiam à calculo liberaisti, & manet adhuc in perfecta valetudine.

Deum precor ut Reipublicæ bono Te diu velit superstitem esse & valere.



## Nostra Responsio.

Eximie Domine,

**A**ccepi Literas à Te 2 Martii 1684. datas, quibus certior factus sum de bona valetudine filii Tui, natu majoris (quem non ità pridem à calculo tuo Oed liberavi.) Sed me statim dolor aggressus est, cum literis iisdem percepi, filium tuum juniorem eodem malo oppressum esse, quo prius senior afflictus fuit, quem (vestrâ me invitante Dominatione) hodie visitavi & calculum inveni, juglandem magnitudine excedentem, solidum etiam & confirmatum.

Quoad istum, cujus audaciâ fuisti seductus, benè novimus Thrasonem esse vanum, & qui gloriari solet de rebus impossibilibus & extra sphaeram activitatis humanæ positis, nec erubescet de rebus etiamsi turpissimis; qui nihil honoris vel ingenuitatis habet, nihil quoque ipsi detrahi potest. Ingentem offendimus talium Impostorum gregem, perniciosam hominum sæcem, qui ruditate & inscitiâ suâ imponentes, & in circulis civitatum versantes, vanissimo verborum strepitu panaceæ miracula jactant.

tant. His verò mendacibus, & inanibus  
 Medicastris præstaret tacere, quàm in de-  
 trimentum proximi nociva remediorum  
 crepitacula credulis obtrudere. *Ten Rhyne*  
*Tractat. de Arthr.*

*Quod ad nos attinet, ut talem licentiam*  
*nobis nunquam assumemus, ità in aliis & con-*  
*temnendam & supprimendam duximus.*

*Id nobis astipulavit jure nobilissimus ipse*  
*Galenus, Medicorum Princeps, qui asserit*  
*quòd medicamentum integris viribus vesti-*  
*cam attingere non potest, atque si conceda-*  
*mus attingere posse, vis medicamenti in-*  
*fringitur tum amplitudine vesicæ, tum in-*  
*volucris & pituità multà quâ circumvolvi-*  
*tur.*

Itaque jam tandem ad ultima remedia progredimur, quæ si tentanda sunt, exercitio instituenda est (de qua vid. Paræum, Schultetum, Hildanum, Cornelium Celsum, &c.) diebus verò aliquot antea, victu corpus præparandum est, ut modicos salubresque cibos & minimè glutinosos assumat, & inter hæc ambulandi exercitatione utatur, quò magis calculus ad vesicæ cervicem descendat, ut ipse Celsus.

Cujus rei ubi fides est, pridie id corpus tenui victu nutriendum, & tunc loco calido curatio adhibenda est, quæ diversis modis ordinari potest,

**PRIMUS** apparatus vocatur minor, qui positionem ægri continet, & videtur *απὸ πλάτης* apprimè exprimi, ut hæc figurâ demonstratur.

Omnibus itaque præparatis index & medius digitus manûs sinistræ in anum immittuntur, dextrâ manu venter inferior versus vesicam deprimitur. (à violenta compressione hîc summoperè cavendum, hinc enim atrocissimi dolores, inflammationes, immò ipsa gangræna.)

Ex quibus evenit, ut in angustum compulsa vesica faciliùs calculus capi possit, quo capto in perinæo super calculum fit incisio,



incisio, digitisque, si minor sit lapis extrudatur, sin verò major, hamulo extrahitur.

Minimè festinanter hac in re agendum, sed ità, ut quam maximè tuto id fiat, nam læsâ vesicâ nervorum distentiones cum periculo mortis excitat.

SECUNDUS est Hildani, qui sit hoc modo: omnibus præparatis, Medicus catheterem, (non talem intelligo, quali ad urinam suppressam utimur, sed qui sulcum seu fossam habet, vid. Paræum, lib. 17. cap. 44.) in vesicam immittit super calculum, tum novaculâ (qualis hic est delineata) media sui parte obvolutâ, incisionem facit ad catheterem usque, postmodum super catheterem sive itinerarium per vulnus conductorem immittit, catheterem, ut virga sit libera, extrahit, conductore, si sit opus, vulnus dilatat, tumque per latus conductoris cochlearia immittit, extracto conductore, immissoque in anum digito, hamulo prehendit & extrahit (Tortorem) calculum, sive integrum, sive frustulatim, si nempe major justò aut tenerioris compaginis fuerit.

TERTIUS MODUS, quando modo præcedenti vulnus est inflictum, super conductorem tenaculam immittit, quo extracto

extractoprehendit Medicus calculum, & sic eum extrahit, quod locum habere potest, cùm lapis hamulo extrahi nequeat.

**QUARTUS** operandi modus Lithotomia Franconina appellatur, ab Authore Petro Franco, qui fit hoc modo :

Incisione præcedenti modo factâ, circa extractionem calculi nihil molitur Lithotomus nisi calculus in vulnere compareat, sed vulnus more solito ligat, post aliquot dies ( nisi calculus suâ sponte per vulnus excidat, quod sibi in sua praxi aliquoties accidisse dicit inventionis hujus Author Petrus Francus ) calculum extrahere conatur, qui operandi modus locum debet habere, quando æger est valde debilis, ut judicat Hildanus.

**QUINTUS** Modus est cùm calculus est tam magnus, ut per vulnus in collo vesicæ factum, transire non possit, nisi substantia membranea vesicæ, vel ejus sphincter lædatur : quod Author Petrus Francus non proponit, ut ipsum aliquis imitaretur, Sed in casu tanquam desperato, coactus precibus parentum infantis, in quo operationem instituebat, fecit.

Æger erat infans bimulus, qui calculum ovo gallinæ non minorem in suo gerebat corpusculo ( in adultis hanc operationem

tionem locum non habere vult notari Author) sectionem instituebat in inguine & superiore ossis pubis parte, ut fere partus cæsareus fit, & sic fundum vesicæ transfodiebat, & extrahebat calculum.

Infans quamvis maximè debilitatus, fuit restitutus, & vulnus sanatum: tale Hildanus alibi in suis observationibus quoque commemorat exemplum.

SEXTUS & ultimus modus fit instrumento quod excogitavit Hildanus: factâ eo modo (uti dictum) incisione, immittit per vulnus suum instrumentum super calculum, illud quando est immissum dilatarî potest (instar instrumenti quod Speculum matricis vocamus) post dilatationem conatur Medicus calculum apprehendere, apprehensumque extrahere.

Parisiensis ille Lithotomus, cui Collet nomen est, plurimos hoc modo satis feliciter secuit, ex cujus, ut & aliorum curiosa inspectione tantum profecit Tractatuli hujus Author, ut hunc cum cæteris quoque Operationis modis aggressus fuerit, & adhuc quotidie peragit.

In scemineo Sexu, five sit Virgo, five nupta, longè minori negotio, & citra sectionem magnâve sanguinis effusionem, hanc operationem instituere & peragere licet:



licet : quia vesicæ foramen in pudendo statim occurrit visui, sufficit solum catheterem immittere, & infra ejus sulcum dilatatorium instrumentum indere, denique forcipe lapidem extrahere : Interdum tamen ob calculi nimiam quantitatem in vesicæ orificio parva incisio facienda est, à qua nihilominus, ut & à nimis violenta dilatatione, periculum metuendum est, ne læso sphinctere, sequatur involuntaria urinæ emissio.

#### A R T I C. XXIV.

**J**AM sequitur, ut, extracto calculo, agamus, qua ratione sit regendus æger, non statim ille in lectum erit reponendus.

Si valens fuerit corpus, nec magnopere vexatum, sinere oportet sanguinem fluere, quo minor inflammatio oriatur.

Tunc desiderare debet in semicupium, ità ut à genibus ad umbilicum aqua teneat (cætera vestimentis circumdentur) quo sanguinis hæmorrhagia sistatur.

In corpore imbecilliori hæmorrhagia statim sistenda erit, agglutinanda aliquando cucurbitula & inguinibus & coxis, & super pubem, si sanguinis fluxus cohiberi nequeat, qui si cohibitus, æger resupinus in lectum collocandus est.

Venter

Venter interim inferior ab umbilico ad lumbos, itidem & pudenda, oleis convenientibus paululum calefactis optimè inundatur.

Vulneri linteolum duplex vel triplex, astringenti medicamento madens, imponatur; cannula aliquando vulnere immittitur, quâ arenulæ & sanguis extravasatus postmodum commodius expurgetur, per illam & siphon quoque immitti potest, quo, necessitate urgente, vesica syringetur, sicque continuò excernatur, quicquid præternaturam in ea continetur.

Si Lipothymia superveniat, cardiacis removeatur, ægerque placidè ad quietem reducatur, qui nisi obrepat, anodinis mitioribus promovendus.

Sicque, si vires ferant (hæc ipsa Celsus ~~præter~~ tradit) interpositis viginti quatuor horis, balneum iterum ingredendum, & pro virium constitutione in eo demorandum; si sudor aliquis erumpat, spongiâ detergendus erit.

Inter hæc si somnus blandior æqualisque respiratio adsint, si lingua sit madens & modica sitis, & venter infimus sedit, & mediocris cum modica febre dolor, curationem feliciter procedere, certum est.

Denique, quantum possibile est, & cibis & medicamentis allaborandum est, ut  
natura,

natura, quæ saluberrimum balsamum sup-  
peditat, corroboretur, sicque vulnus con-  
solidetur.

## ARTIC. XXV.

**O**Mnibus itaque, ad renum & vesicæ  
calculum pertinentibus hucusque  
breviter descriptis, unicum superest,  
nempe modus eximendi calculum ex ure-  
thra, quem breviter describemus.

Contigit aliquando, ut calculus exi-  
guus è vesica excludatur, in urethram  
tamen illapsus, ibidem sistitur, urinæque  
iter occludit.

Quo in casu omnia remedia tentanda  
& applicanda, quæ apta nata sunt calcu-  
lum educere absque ulla incisione.

In horum Numero Primò occurrunt  
medicamenta diuretica, emollientia, fo-  
mentationes, infusus in balneum, qui  
sunt relaxantis qualitatæ, quorum ope  
calculum non infimæ quantitatis eduxi-  
mus ex urethra ingeniosissimi admodum  
Viri, Equitis Aurati, & Regi à rebus ca-  
strensibus Architecti.

SECUNDUS modus est extensio ure-  
thræ per flatum, ligando eam virgæ par-  
tem, quæ juxta pubem est, eodem modo,  
quo



quo frequenti usu fuit apud *Ægyptios*, urethrâ nempe itâ dilatatâ, liberior exitus calculo patet.

**TERTIUS** modus sugendo efficitur, cum maximo conatu spiritum trahendo, lapis simul attrahitur.

**QUARTUS** modus est comminuendi calculum, ope tenaculæ & specilli (de quibus vide *Paræum*, *Hildanum*, *Schulterum*) qui cum successu sæpius efficitur, ideóque maximè laudandus est.

Hæc verò si frustranea sint, ultimò tandem fiat incisio : inter Authores summa disputatio est de loco, in quo incisio hæc facienda est.

Quidam eligunt partem lateralem, cavendo, nè inferiorem secando, fiat fistula ; aliqui partem inferiorem, nè corpora nervosa offendantur.

Quod ad nos attinet, utrumque modum tentavimus, curam invenimus faciliorem, neque ullum ægris fuisse detrimentum, percepimus, cùm incisionem fecimus in parte nervosa laterali : incisione factâ, calculus unco subtilissimo & tenerrimo educi potest.

Quibus jam peractis, vulnera post extractionem calculi (sive vesicæ sint, sive urethræ) curanda supersunt, de quibus  
abunde

abunde scripserunt Practici, ideóque & ea impræsentiarum mittimus, & pedem hic ultimum sistere voluissemus, nisi plurimum me rogasset Typographus, ut tractatui huic adeò brevi aliquid adderem, quod utilitati ejus, & bono publico inserviret, non didignatus sum desiderio ejus additamento quodam homogeneo respondere.

## ARTIC. XXVI.

**M** IHI itaque cogitanti & revolventi prædicta, nihil magis adæquatum, aut consonum magis apprehendi, quàm ut brevem aliquam vesicæ descriptionem annecterem anatomicam.

Cuilibet enim Lithotomo incumbit, ut subjectum operis sui non solum sit ei notum, & naturam illius generalem intelligat, sed & omnes ejus proprietates, & quæ maximè ad opus perficiendum conducunt, ità nimirum suffragante Veslingio his ipsis ferè verbis, nec audacia in opus tam arduum præcipitabit, nec metu trepidabit.

*Vesicam* itaque quod attinet *urinariam* in infimo ventre sitam habemus, osse pubis, osse sacro, & osse coxis circumdatam, in ea scilicet hypogastrii cavitate quæ pelvis nominari consuevit, quod à natura ità  
com-

comparatum invenimus, ut tenues sero-  
lâsque sanguinis partes à renibus ad eam  
defluentes, reciperet, & tandem vel onere  
gravantes, vel acrimoniâ pungentes, ex-  
pelleret.

Vesicâ hæc in masculis sita est suprâ  
intestinum rectum, & *collum* ejus eidem  
intestino atque etiam glandulis prostaticis  
annexum est; Figura sua lagenam inver-  
sam referens, utpote paginâ aversâ de-  
monstratur.

In fœminis superjacet utero, cujus pars  
anterior vaginæ & ossibus pubis alligatur.

*Ligamentum* à fundo vesicæ porrigitur  
ad umbilicum, cui insertum est & an-  
nexum, (apud Anatomicos Urachus dic-  
tum) quod vesicam tenet suspensam, &  
impedit, quo minùs ejus collum nimis  
premeretur, nec incumbentium intesti-  
norum pondere devolveretur, duplica-  
tura etiam peritonæi, intrâ quam deli-  
tescit vesica, eidem huic usui summoperè  
inservit.

Quod ad amplitudinem attinet, vesica,  
urina vacua, non excedit pugni magni-  
tudinem in adultis, sed cùm urina repleta  
est, grandior fit, ità ut aliquando, vio-  
lentiore distentione in superiori parte ossis  
pubis deprehendatur.





Anno nuperrimè elapso, non procul à Londino in oppido Depthfordia (vulgò Depthford) juxta Greenvicum, puerum vidimus, qui tantam urinæ suppressionem habebat, ut vesica illius ad umbilicum proximè pertingebat, & venter tumebat, ut in gravidis fieri solet. Urina suprà modum oppressa, tandem exitum violentum sibi fecit (eo loco ubi carnosà urethræ valvula est) in ipsum scrotum, cujus membranæ post maximam distentionem tandem fuerunt disruptæ & sic eadem viâ urina continuo adhuc effluit.

Lithotomus hic velim observet, cùm Lithotomiam minori (ut dicimus) apparatu suprà digitum administraturus est; quod quando vesica évacuata est & corrugatur, facilè digitis (in anum immisiss) fundum vesicæ unà cum calculo ad collum ejus protrudere potest, & sic calculum sine ullo periculo post factam incisionem educere: Sed vulnus in fundo vesicæ vel parte ejus membranæ mortale est (Κύσις διακοπῇτι θανάτῳδης. Hipp. Sect. 6. Aph. 18.) ob consensum scilicet nervorum, vix unquam ad sanitatem reducitur.

In homine unica tantùm naturaliter reperitur vesica; Riolanus tamen cum aliis observat duplicem se invenisse vesicam;

cam, vel saltem septo intermedio divisam. vid. Bauhin. in Theatr. Anatom. lib. 1. cap. 31.

Quod ad substantiam vesicæ attinet, partim membranosa partim carnosâ reperitur, mirabili Dei (Summi illius Opificis) fabrica, ut illius fundum etiam & totum corpus nervosum extendatur, multumque urinæ contineat, & beneficio partis musculosæ contrahatur iterum & corrugetur.

Collum ejus musculosum est & fibrarum ope (ad instar sphincteris) vesicam aperit & occludit, & impedit nè involuntariè urina effluat: In viris longius, angustius magisque incurvatum est; in fœminis verò brevius, amplius & magis rectum reperitur.

Juxta ejus sphincterem duas natura produxit glandulas (*prostatas dictas*) quæ etiam vesiculæ seminales appellantur, in quibus post perfectam elaborationem semen virile repositum est, atque usui necessario reservatur.

Lithotomi est harum partium summam cautionem habere, Sphincteris scilicet & vesicularum seminalium. Læso enim sphinctere in posterum fiet involuntaria urinæ emissio; læsis etiam glandulis seu vesiculis seminariis, in futurum  
forsan



forſan ſterilis erit, & ad generationem ineptus, licèt à calculo liberatus.

Dè tribus veſicæ foraminibus, ingreſſui & egreſſui urinæ dicatis, de venis & arteriis (ab hypogaſtricis) de nervis *in collo veſicæ*, ab oſſe ſacro, & à nervorum ſexti paris conjugatione *in corpore veſicæ*, nihil dicere hîc volumus, de iis enim accuratè ſatis ſcripſerunt Anatomici, ad quos Studioſum Lectorẽ mittimus, nos tantũ ea obſervari hîc volumus, quæ Lithotomis imprimis obſervanda ſunt, hoc ſolum ſtudento, ut quæ neceſſaria & maximè utilia ſint hũmano generi, compendioſè divulgare poſſimus : quod ſi aliquid vel omiſſum, vel circa aliquod erratum fuit, humanis erroribus ſubjecti ſumus, nec dubitamus, quin omnes ingenui præſentis ætatis Viri condonent, & vel ipſi aliquid perfectius producant, vel poſteris emendandum relinquant. Horatianum illud coronidis loco ponam,

— *Si quid noviſti rectius iſtis,  
Candidus imperti, ſi non his utere mecum.*



---



---

## POSTSCRIPTUM.

**C**Um Typographus tractatum hunc typis mandâisset, & perfectè complevisset, ab ingeniosis quibusdam hujus Civitatis viris, nobis relata est historia Viri verè dignissimi τῷ μαχαρίτῃ, *Thomæ Adams*, Equitis Aurati, Aldermanni, ac quadraginta annis abhinc circum circa elapsis Prætoris hujus Civitatis nobilissimæ, qui annos octoginta duos agebat antequam moreretur.

Vir erat summæ quidem moderationis & temperantiæ, qui; ne in publicis quidem conventibus, ut fideliter accepimus, per quadraginta vel quinquaginta annos, non exhaustit uno tempore plus quàm libram vini gallici rubri, & concludebat omnia cum haustu vini Hispanici.

In quotidiano & usu domestico quolibet manè exhaustit poculum plenum cerevisiæ lupulatæ saccharo commixtæ.



Per multos annos, quibusdam temporibus dolorem sensit in urinæ excretionem circa perinæum, rarò guttatim & cum acrimonia urinam emittebat.

Paucis ante mortem horis nullum habebat mingendi desiderium, nec ullum patiebatur vesicæ distentionis dolorem.

Ad dormiendum tandem admodum propensus fuit, acsi narcotica assumpsisset, & sic intra viginti quatuor horarum spatium vitam cum morte mutavit Vir ille admirandæ quidem patientiæ & gravitatis Senator, Civitatis hujus magnum decus & ornamentum.

Obiit vicesimo quarto Februarii.

{ *Ætat. suæ 82.* }  
 { *Æræ Christianæ* }  
 { 1667. }

Postquam dissectus erat à Chirurgo notissimæ experientiæ Do. Hollier, vesicam invenit urina vacuam, sed calculo (pyri majoris figuram repræsentante) inusitatæ & incredibilis magnitudinis impletam\*,

---

\* Hæc ad pag. 34. immediatè post primum paragraph. addantur ad hæc verba, *Minimè dum vivunt attingendi.*

viginti quinque unciarum ponderi & dimidiæ respondentem, cujus delineationem hîc apponendam curavimus. Canalem habebat calculus ab ea parte inferiori, quæ intestinum rectum spectat, per quem transitus liber urinæ patuit.

Curiosa inspectione, summâ etiam observatione non indignum videtur, quod canalis hic ortum suum duxit non procul ab illo loco, ubi uretheres implantantur vesicæ, juxta ejus collum, urina quippe ab uretheribus destillans hunc sibi paraverat canalem.

Nos etiam opinamur, urinam hunc sibi canalem fecisse, cum primùm minor fuit calculus, nec prorsus tamen abnuimus, quin processu temporis canalis hic exactior & amplior redditus fuit ab urina, (calculosa materia imprægnata) juxta notissimum illud;

*Gutta cavat lapidem, non vi, sed sæpè cadendo.*

Sic enim liberum sibi fecit transitum ad ipsam usque urethram, canalis enim formam habet semicircularem, in medio etiam circa partem descendente[m]  
novus

novus alter prorumpebat camalis, & per hanc viam urina libera ad urethram vergebat, atque excernebatur, absque ullo ferè incommodo aut pœna gravi-ori.

Hujus canalis cavitas adæquata fuit Venæ cuius majori secundum longitudi-nem in medium dissectæ, utpotè delinea-tione priori ostenditur.

Hiscæ jam præmissis, quæ puram putam Historiam spectant, proximum est ut causas scrutari conemur, qui-bus veritas, quæ in fundo latitare so-let, clarior emergat, & oculis magis appareat.

Primò itaque opinamur cerevisiam il-lam lupulatam saccharo commixtam, quam per quinquaginta annos quolibet tempore matutino largiori haustu assump-sit, causam fuisse calculi ad tantæ magni-tudinis instar excreti.

Quod ad dolores illos attinet, quos aliquando passus est, & quales strangu-ria afflicti subire solent, à calculo ha-buit, sed longè illi fuissent vehemen-tiores, & quidem intolerabiles, nisi ab illius canalis beneficio (quasi Οὐρὸν ὁρῶν  
μυχαῖν



in *unxan* subsidio adjutus) auxiliatrices  
& obstetricantes opes ad urinæ facilitatem  
excretionem habuisset, immò certò  
certius, nisi hic adhuisset, multis antea  
annis diem obiisset.

Cur tandem in soporem inciderit, am-  
bigimus, causam tamen ejus concipi-  
mus quod sanguis ejus, vel forsan quod  
serum nimis crassum fuit, unde ordi-  
naria seri secretio & colatura in reni-  
bus, non ut antea effici potuit, sed po-  
tius revertens, cerebri substantiam me-  
ningumque poros, suo pondere premens  
& gravans, somnolentiam in ipso excita-  
vit ( uti novimus illud frequenter acci-  
dere ab humoribus aqueis pituitosis, &  
frigidis ) unde spiritus animales antea sa-  
tis agiles, dein verò torpidi minúsque  
mobiles, in ventriculis cerebri detenti,  
vicinósque nervos distendere non valen-  
tes, soporem pepererunt, sicque frac-  
tis viribus, vitam cum morte commu-  
tavit.

Hæc itaque sunt, quæ à *Gulielmo A-*  
*dams*, Equite Aurato, Filio Senatoris piæ  
memoriæ, nobis exhibita fuerunt, con-  
cessâ etiam potestate, ut libello huic  
nostro

nostro affigerentur quæ unâ cum insculpta admirandi illius calculi delineatione fieri curavimus in perpetuam rei & Viri dignissimi memoriam.

---

**F I N I S.**

---